

Kaarata ya Pawulo yowaalebela aEfeso

Madhu oovolowana

Murumiwi Pawulo aalebele kaarata ela aKirixtu yaali nluwa na oEfeso; nna-roromela ela mooligana ni madhu enafwanyeya va makapitulu ala: 1.1, 3.1,4. Pawulo aalebele kaarata ela azhentiya ni aZhudewu yaali oEfeso, Efeso naali nluwa nuulubale na oAziya Mung'onong'ono nalamuliwa ni aRoma. Alebi-le kaarata ela agali mukaambura ya vaade oRoma muwari mwa yaaka ya 60 ofiyedha 62 Kirixtu agabaliwe. Vooleba kaarata ela afuna wawaaddela dhedho Mulugu dhamaruweliye dhoofuna otugumanya dhoopaddusiwa dhaatedhene dha odhulu ni dha elabo ya vati mwa Kirixtu. Pawulo onaaloba athu aatene a Mulugu wi muumohini mweewa ni Kirixtu wooneyele mwiigumini mweewa, moorumeedheya ni dhedho Mulugu dhafuniye.

Epaddi yowambeela ya kaarata ela enooniha dhooharela wa ale enakala muu-mohini ni Kirixtu. Sowi Mulugu onowaasakula okala athu aaye, waakumiha muudhaarini mwa dhoothega. Teto Muneba Woweela onowawuubusedha dhedho Mulugu dharoromelihiye. Epaddi ya nabiili Pawulo onaaloba aKirixtu wi omohi weewa wooneyele voweela mwiigumini mweewa mwaatemwene.

Ogawanyeya wa kaarata

Malojelo, mareeliho ni olibela *1.1-23*.

Omohi wa aZhudewu ni ale ehili aZhudewu *2.1-22*.

Pawulo, murumiwi wa ale ehili aZhudewu *3.1-21*.

Owaraalihiwa okala muumohini mwiigumini exa *4.1 ofiyedha 5.20*.

Owaraalihiwa mukalelo wapama mwiimudhini *5.21 ofiyedha 6.9*.

Yeela dha koddo dhoowanana mineba *6.10-20*.

Malojelo oogomihedha *6.21-24*.

Madhu oolojela

1 ¹ Wa oweela mirima enakala oEfeso, nyo oororomela mwa Yesu Kirixtu. Di miyo Pawulo, oosakuliwa a Mulugu wi gikale murumiwi

a Yesu Kirixtu. ²Mulugu Babiihu ni Nabwiya Yesu Kirixtu yuuvaheni mahala ni murenddele mmirimani mweenyu.

Mareeliho mwa Kirixtu

³Athithimihiwe Mulugu, oli Mulugu ni Baabi a Nabwiya eehu Yesu Kirixtu, oyene onireelihe ni mareeliho maatene enakamihedha mineba dheehu, mwiipaddi dha odhulu, mwaha wi nili vamohi mwa Kirixtu. ⁴Mulugu ahiirana ela mwaha wi ahinidhivela, onisakula elabo ehinasanyiwe wi nooniwe wona oweela mirima ni oohukalana yoothega. ⁵Vanthomiliye hiyo okala anaaye mwa Yesu Kirixtu, aharihaga odhiveliwa waaye, ofuna waaye: ⁶oliye ahiirana ela wi oonihe nthithimiho na mahala aaye voonivaha ebeweene Mwaanaye amudhiveliye. ⁷Mwa Mwaana ola, nihikanna wooboliwa ni mwazi waaye, oleveleliwa dhoothega dheehu. Mulugu onowooniha wunnuwa wa mahala aaye. ⁸Mulugu ohukuthulela mahala ala wa hiyo ni tthottho ni ononelamo waatewene. ⁹Ohunivuhulela dhamaruweliye dha ofuna waaye. Ahimaruwela wiirana nda mwa Kirixtu. ¹⁰Moomaruwela waaye, mudhidhiya wafiya, onotugumanya mwa Kirixtu dhego dhaatedhene, dhego dha odhulu ni dha elabo ya vati. ¹¹Mulugu ohunisakula teto hiyo, aZhudewu wi nikale athu aaye. Oliye ahiirana nda mwaha wi ahimaruwela wiirana mooligana ni ofuna waaye, ¹²wi hiyo, aZhudewu, owambeela ojejihedha mwa Kirixtu, nimutamaalege Mulugu, mwaha wowunnuwa waaye. ¹³Mwa Kirixtu, nyoovo mugeewile madhu eli ebaribari, (Muselu Wapama wa ovulumusiwa weenyu,)^a varumeedhiliinyu mwa oliye, muhuheliwa etoonyihedho yoohuthima ya Muneba Woweela waroromelihiwe. ¹⁴Vowi Mulugu ohunivaha Muneba Woweela, nnokalana ebaribari wi oneere onivaha mareeliho yaniroromelihiye. Nda dhinaapadduwe mudhidhi oyene Mulugu vinawooboliye athu aaye.

Ovahedha mahala ni malobelo

¹⁵Mwaha wa dhaatedhene Mulugu dhiiriliye, mwaha wowiiwa nroromelo neenyu mwa Nabwiya Yesu, vowiiwa wi munowaadhivela athu aatene a Mulugu, ¹⁶kaginahiya omutthetheela Mulugu mwaha wa nyoovo, wuwuubuwelelani mmalobeloni mwaaga. ¹⁷Miyo ginolobela wi Mulugu a Nabwiya eehu Yesu Kirixtu, Baabi anthithimiho, oovaheni muneba wa tthottho ni wa ovuhulela wi mwaande omunona oliye. ¹⁸Miyo ginolobela teto wi Mulugu afugule meento a mirima dheenyu wi munone mareeliho aaye yoororomelihiyeni

^a **1.13** Ahinawelege odhulu Yesu Kirixtu ahiroromeliha Muneba Woweela wa Mulugu weere orumihiwa wa athu aatene enamuhara Yesu. Muneba ola onakala mwa hiyo, ononisogolela wi needdege mwa ofuna wa Babiihu.

vowiithaniliyiye. Ginolobela wi munone dhooreela dha nthithimiho dhinaroromelihiye waavaha oweela mirima, ¹⁹munone wunnuwa wa owodha waaye. Oliye onolabiha owodha wula mwa okamihedha wa ale enaroromela. Wula owodha wuulubale ²⁰Mulugu woonihiliye vamvenyihiliye Kirixtu wa athu ookwa, ahimukaraatiha moonoo waaye wooja mwiipaddi dha odhulu. ^b ²¹Oliye oli vadhulu va anamathonga aatene a odhulu, vadhulu va oolamula, vadhulu va oowodha ni akopolo apama naari abure. Ndina naaye nnowaakwaranya mandina maatene, kahuwo wa mudhidhi olenave, mbwenye teto mudhidhi dhaatedhene dhedho dhinadha. ²²Mulugu *“ohuhiya dhego dhaatedhene vati va manyalo a Yesu”*, ^c wi akale musogoleli a dhedho wi akale muru wa gerezha. ²³Gerezha oli mwiili waaye. Oliye dinavaha gerezha owodha waatewene ni odhaaliha dhego dhaatedhene.

Wooboliwa odheela mwa mahala

2 ¹Nyo mwaali ookweene mminebani mwaha woohiwelela weenyu ni dhoothega dheenyu dheeddeliinyu. ²Mudhidhi olene mweeddela mukalelo wabure wona wa elabo ya vati; mweewelela muneba wootakala ole onalamula vadhulu va mineba dhaatedhene, oliye di mwene onawaang'anela ale ehinamwiwelela Mulugu. ³Wale hiyo aatene teto needda makalelo ayene. Needda wona mwa mukalelo wa emuthu yeehu, niiragana dhafuna mwiili ni tthottho dheehu. Mowindala, naali athu a mwiili wona amohiwa, mwaha wa ela Mulugu akala ootakaleliwa ni hiyo.

⁴Mbwenye Mulugu dooreela mwa thagaraga, ononidhivela valubalevene. Mwaha wa ela ⁵ohunivaha egumi mwa Kirixtu, nigalive ookweene mwa dhootakala dheehu. Nyo muli oovulumusiwa ni mahala a Mulugu. ⁶Vowi nili vamohi ni Kirixtu, Mulugu ohuniveanyiha muukwani mwaha wa Kirixtu, onikaraatiha ni Yesu Kirixtu mmamburoni a mudhulu-dhulu wi nilamulege ni oliye. ⁷Mulugu ahiira nda wi mwa mudhidhi dhaatedhene dhinadha osogolo oonihe wuunnuwa woohupimeya wa mahala aaye, oonihaga odhivela waaye wa hiyo mwaha wa Yesu Kirixtu. ⁸Nyo muli oovulumusiwa mwaha wa mahala oorumeedhiwa mwa nrromelo, ovulumusiwa kunadha wa nyooovo, eehi. Yoovaha ya Mulugu. ⁹Ovulumusiwa kunadha mwa mabasa, mwaha wa ela kakalevo owiithukula. ¹⁰Dhiinova hiyo nili oopaddusiwa axa a Mulugu, oosasanyiwa mwaha wookala muumohini ni Yesu Kirixtu wi niiregena meerelo apama, meerelo Mulugu yaasasanyiliye wi nawiiregena.

^b 1.20 *Moono waaye wooja* Moone Masaalimu 110.1. ^c 1.22 Masaalimu 8.6

Mulugu onowawaandaniha azhentiya ni aZhudewu mwa Kirixtu

¹¹Nyo, mwabaliwe mwa azhentiya,^d mweethaniwa oohugwaddiwa ni ale yagwaddiwe, ogwaddiwa wula wa aZhudewu waali mweeddelo weeriwana ni madada a athu.^e ¹²Muubuwelege mwa mudhidhi ole mwahanninyuna Kirixtu, mwaali aleddo, amarala, oomwalanihiwa ni mulogo wa Ezarayeli.^f Kamweelengeliwe ni aZhudewu mwa mapangano ni Mulugu. Mwa mapangano alena Mulugu ohiirana yoojijhedha ni aliwa. Mbwenye mweedda mwihinna yoojijhedha, muhumunonile Mulugu.

¹³Mbwenye dhiinova, mwa Yesu Kirixtu, nyo azhentiya mwaali woolapela ni Mulugu muhaaddamelihiwa ni mwazi wa Kirixtu. ¹⁴Oliye ohusasanya murenddele vaari va hiyo, oode ni aZhudewu, ohunigumaniha. Obwanyulavo wiiddana weehu waali wona cinga nanimwalaniha. ¹⁵Ohaakwaneliha murenddele vaari va hiyo vookwa vamuraadini, ohumariha gano dha malamulo a aZhudewu. Yoofuna yaaye yaali wi mwa malogo ala meenddi apadduse nlogo nimohi nixa, muumohini ni oliye, mowindo ohusasanya murenddele vaari va ala meenddi. ¹⁶Okwa wa Kirixtu vamuraadini ohubwanyula wiiddana waali vaari va malogo ala meenddi. Ni muraddi, oliye waagumaniha mwa mwiili mmohive, wawaandaniha mameenddeene ni Mulugu. ¹⁷Ahidha wuulaleyelani murenddele wa nyo azhentiya mwaali woolapela, waalaleyela murenddele aZhudewu yaali owaaddamela. ¹⁸Mwa oliye, hiyo ni nyo, nihikanna waanda ofiya wa Babiihu, mwa Muneba mmohive.

¹⁹Mwaha wa ela, dhiinova nyo kamuli amarala naari aleddo wa nlogo na Mulugu, dhiinova muli nlogo nimohive, muli emudhi ya Mulugu. ²⁰Muli wona nyuba emagiwe vadhulu va arumiwi ni aliba ovuhulela, Yesu Kirixtu mwiinyeene, dili nibwe noohiddeela. ²¹Mwa oliye dhaatedhene dhinoliba, mwa oliye nyuba enowunnuwa ofiyedha okala nyuba ya Nabwiya yuulubale. ²²Mwa oliye nyo azhentiya teto munomagiwa vamo-hi ni oororomela amohiwa wi mukale nyuba eyene munakala Muneba Woweela wa Mulugu.

Mulugu ahimuruma Pawulo waalaleyela azhentiya

3 ¹Mwaha wi Mulugu ohaagumaniha malogo ala meenddi miyo, Pawulo, ginowuulobeelani. Gili oofugeliwa mukaambura mwaha wa mabasa Yesu Kirixtu egivahiliye ohidda wuulaleyelani azhentiya.

^d 2.11 *Azhentiya* naali ndina Pawulo ni aZhudewu amohi nawiithaniwana ale yahaali aZhudewu: athu a malogo mamohi. ^e 2.11 *AZhudewu* yowaagwadda aniwa anaalobwana yamala malabo matanu ni maraaru wona etoonyihedho yowaandana ni Mulugu. Moore Wambeela 17.10-12. ^f 2.12 *Ezarayeli* naali ndina na nlogo ni na elabo ya aZhudewu.

²Gihikalana ebaribari wi mwihiiwa dha mabasa ayene ginkeleliwiimi mwa mahala a Mulugu, mabasa owuukamihedhani nyoovo. ³Mulugu ohugivuhulela dhoomaruwela dhaaye wona guulebeliimini mwa madhu oogwaddela, ⁴ayene mwaweelengaga, muneerege wiwelelamo nde dhineewelega miyo wa yoomaruwela ya Mulugu, oli Kirixtu. ⁵Wale Mulugu kaavuhulele yoomaruwela eyo wa ababiihu, mbwenye vano, Muneba ohuvuhulela eyo wa arumiwi oweela mirima ni aliba ovuhulela. ⁶Yoomaruwela eyo si ela, azhentiya eneere yaakele mareliho mamohive ni aZhudewu, malogo meendi ala ehisadduwa okala mwiili mmohive. Meendi ala, muumohini ni Yesu Kirixtu, enowaakela dhooromeliha dha Mulugu. Ola bu Muselu Wapama.

⁷Mwa mahala aaye, Mulugu ohugivaha mabasa oolaleya Muselu Wapama ola, ohugisasanyedha ni owodha wa kopolo dhaaye. ⁸Naari ngalive ooyeva mwa aKirixtu aatene, ohugivaha mahala ala owaalaleyela azhentiya Muselu Wapama wa dhoorela dhoohupimeya dha Kirixtu. ⁹Teto Mulugu ohugivaha mabasa owawaaddela athu aatene wona mwemo munaakwanelihiiye omaruwela waaye. Okuma omambeelelo vapaddusilihiye dhaatene, ofiyedha peeno, kavuhulele wa muthu yoomaruwela ela. ¹⁰Yoofuna yaaye yaali yowi dhiinova avuhulele wa angero aatene ni mineba dhabure dhaatedhene wi oliye da tthottho mwa dhaatedhene. Makuru meendi ala eneere yoone nda yawoonaga aZhudewu ni azhentiya muumohini mwa nikuru nimohive. ¹¹Ela yaali yoomaruwela yaaye okuma elabo ehinapaddusiwe. Dhiinova ohaakwaneliha yoomaruwela ela odheela dhedho dhiirile Yesu Kirixtu Nabwiya eehu. ¹²Mwaha wi nnomuroromela Kirixtu, mwaha wi nili muumohini ni oliye, nnowaanda ofiya vameentoni va Mulugu, nihoovaga. ¹³Mwaha wa dhaatedhene dhedho dhuwaaddeliimini dha yoomaruwela ya Mulugu, ginowuulobani wi muhukukumuwe mwaha woorabula waaga mukaambura. Gili va mwaha wowuulaleyelani. Moohiyaniha, mukale owiithukula.

Pawulo onowaalobelega aEfeso

¹⁴Mwaha wa dhaatedhene Mulugu dhiirilihiye, ginookokora moolobelega vameentoni va Babiihu, ¹⁵oyene opaddusile, athoma emudhi yaatene ya odhulu ni ya vati. ¹⁶Ginolobela wi Muneba Woweela wuulibiheni ni owodha mmirimani mweenyu ni mareliho majinji mwa Muneba. ¹⁷Ginolobela Kirixtu akale mmirimani mweenyu, mwaha woomuroromela oliye. Ginolobela wi misisi dheenyu, milongothi dheenyu dhitibeleye mwa odhivela. ¹⁸Mowindo, ginolobela wi nyo mwiiwelelegemo, vamo hi ni athu a Mulugu aatene, dha orambalala, olapa, otaama, oddiha wa odhivela wa Kirixtu. ¹⁹Ginolobela wi mudidele odhivela wula wi onokwaranya ononelamo wa athu wi makalelo eenyu efiyedhe okala wona makalelo a Mulugu.

²⁰Nimutamaale Mulugu odheela mwa owodha waaye^g onalaba mwa hiyo, vowi onowaanda wiirana dhijinji okwaranya dhinamulobiihu, naari dhinoobuweliihu dhinowaanda wiireya. ²¹Ootamaaliwa akale Mulugu mwaha wowunnuwa waaye onooneyihiwa mwa aKirixtu, onooneyihiwa mwa Yesu Kirixtu. Anamabaliwelamo aatene a mudhidhi dhaatedhene enoodha, emutamaalege Mulugu. Ameni!^h

Ooromela enakala muumohini mwa Kirixtu

4 ¹Mwaha wa dhaatedhene dhedho Mulugu dhuwiireliiyeni, miyo Pawulo, munyakaambura mwaha wa omulaba Nabwiya, ginowuukokomezani wi meeddelo eenyu ekale wona meeddelo Mulugu yoofuniyenaani voviithaniliiyeni. ²Mukalege owiiveyiha, mukalege oopwaasa, mukalege oovilela, mpiselanege murima mmohi ni mukwaaye moodhivela. ³Mwiilibihege wi mukameelege omohi oyene Muneba Woweela onoovahiiani, mukalege mwa murenddele mmohi ni mukwaaye. Murenddele ola wuugumaniheni. ⁴Hiyo aatene nili mwiili mmohive, ninna Muneba Woweela mmohive onakala mwa hiyo. Mwa mukalelo mmohive, hiyo aatene nnaajjihedha mareeliho mamohive, yanroromelihe Mulugu vaniithaniliye. ⁵Oliwo Nabwiya mmohive, niliwo nrromelo nimohive ni obathizo mmohive. ⁶Hiyo aatene nnamweebedha Mulugu mmohive, oli Baabi a athu aatene. Dinanithonga, onalaba odheela mwa hiyo, onakala mwa hiyo aatene.

⁷Mbwenye Kirixtu ononivaha mvahi wi nihiddegena mabasa aaye. Oliye damaruwele makalelo oogawa mvahi nda wi muthu oli aatene akalena. ⁸Mwahaya buuyene Maleba Ootaleleya enawogeliwa, yiiraga:

“Vagweliliye odhulu ahaathukula anyakaambura, ohaavaha mvahi athu”.ⁱ

⁹“Ahigwela” enatapulela ddi? Enatapulela wi Kirixtu vowambeela ahikitela elabo ya vati.^j ¹⁰Ole akitele vati di mmohive oyene agwelile odhulu. Oliye ahiirana nda wi aandege okala mburo dhaatedhene. ¹¹Di Kirixtu waasakulile athu amohi wi ekale arumiwi, amohi anamavuhulela, amohi anamalaleya, amohi amakambuzi, amohi anamasuuziha. ¹²Oliye ahiirana nda wi athu ala esasanyedhe nlogo na Mulugu nimulabege wi mwiili wa Kirixtu otthabwe oliba. ¹³Oliba wula oneerege odhowave nikale aatene muumohini mwa nrromelo neehu, mwa omunona weehu Mwaana a

^g 3.20 *Owodha waaye* onaagiwana Muneba Woweela wa Mulugu onakala, onolaba mwa aKirixtu aatene. ^h 3.21 *Ameni* enatapulela *Dhikale ndo*, naari wi *Siibaribareene*.

ⁱ 4.8 *Masaalimu* 68.18 ^j 4.9 *Elabo ya vati* mu ewogelo ya eGerego enatoonya elabo yeehu, naari wi: elabo ya anookwa.

Mulugu, nifyedhe okala oowaraala, nikale mwa dhaatedhene wona Kirixtu, oli owaakwanela. ¹⁴Nihikale ahima, nihithukuleliwege wula ni wula ni kuluzi, pevo yaatene ya masuuziho ooratha kinaanithukule. Ela enatapulela wi athu oowaraala ni ooratha kinaande oninyengetha ni masuuziho eewa. ¹⁵Moohiyaniha, niwogege dha ebaribari ni odhivela, nikalege oowaraala mwa dhaatedhene wi nsadduwe wona Kirixtu oli muru. ¹⁶Onowaagumaniha aatene a nlogo naaye wona onagumaniha dhipaddi dhaatedhene dha mwiili wa muthu. Dhipaddi dhaatene dhasasanya mabasa eewa, mwiili waatene onowunnuwa okala wooliba, onodhivela dhipaddi dhikwaaye.

Muthu awale, muthu wuxa

¹⁷Mwaha wa ela, mu ndina na Nabwiya, ginowuukokomezani wi muheeddege wona athu abure ehimunonile Mulugu. Moobuwelelo eewa kinna mabasa. ¹⁸Wiiwelelamo weewa wa ebaribari kahuwo wapama. Eli woolapela ni egumi enavaha Mulugu mwaha wi kimunonile, mwaha wovaadda mirima. ¹⁹Kinakalana manyazo, mwahaya buuyene eneepelekiiwa wiirana dha mararuwo. Aliwa enowiiranave dha mararuwo dhoohiyana-hiyana, enofuna yiiraganaave.

²⁰Mbwenye nyoovo kamweeddege mowindala vowi muhusuuzihiwa makalelo a Kirixtu. ²¹Moohaanganyedha, mwihiiwa athu dhina-wogiiwa dha Kirixtu, muhusuuzihiwa masuuziho a ebaribari enawoga dha oliye. ²²Musuuzihiwe ayi: mwihye makalelo awale yeeddeliinyu. Dhoofuna dheenyu dhootakala dhuhuunyengethani, dhihibwanyula dhigumi dheenyu. ²³Dhiinova mmwihye Mulugu arugunuse mukalelo wa moobuwelelo eenyu. ²⁴Mulugu ohuuvahani mukalelo muxa, wooligana ni mukalelo waaye. Vano mweeddege mwa mukalelo muxa oyene. Mweeddege ebaribareene mowogoowa, moweela mirima.

Makalelo a muthu muxa

²⁵Mowindo, kamuwelele owogaga dhooratha. *Muwogege dha ebaribari ni addibilinyu mwa nrromelo.*^k Mwaha wi nili dhipaddi dha mwiili mmohive. ²⁶*Mwatakaleliwa, kamuthege.*^l Kamfiyedhege nduwa odhowa mugali ootakaleliweene. ²⁷Kamumvahe Sathana mpatha wi oweeheni.

²⁸Ole eeya, ahiye wiiya! Moohiyaniha, alabege mwa ebaribari ni madada aaye wi akalena yooja ya vanlaboni. Teto akalena yego yowaakamihedhana oorabula. ²⁹Kamuwogege madhu ooruwana, mbwenye muwogege madhu apama, enaalibiha athu. Muwogege madhu apama enafuneya mudhidhi olene wi yaakamihedhege athu enavuruwana.

³⁰Kamukubanyihe Muneba Woweela wa Mulugu. Mulugu ohuuvahani Muneba oyo, oli etonyihedho yowi muli aaye. Eyo yoororomeliha yowi

^k 4.25 Moone Zakariya 8.16 ^l 4.26 Moone Masaalimu 4.4

nlabo nnoodha nifiye Mulugu vineeriyi anoobole. ³¹Mwihiyi dhaatedhene nda: moobuwelo owaawa, owali, otakaleliwa, okangana, oruwana, dhootakala dhaatedhene. ³²Mukalege apama kadda muthu ni mukwaaye, mudhivelanege kadda muthu ni mukwaaye, mwaalevelelege akwiinyu wona Mulugu wuuleveleliiyeni nyooovo mwaha wa Kirixtu.

5 ¹Vowindo mukale oomuhadhiha Mulugu, wowi muli anaaye oodhivela. ²Mweeddege moodhivela wona Kirixtu onidhivele, anikwela. Oliye ohuveleela egumi yaaye wa Mulugu wona yoovaha yoonukwela. ³Kamwiiregena dhego dhabure wi athu yuuwogegeni yiiraga muli anamararuwa. Kamwiiregena dhego dhookaliha manyazo. Naari kamukalege a nrima. Dhego nda kadhaafwanelele athu oweela mirima a Mulugu. ⁴Kamuwoege dhebeweene, naari dha aneba, naari thalako dhootakala. Dhego nda kadhifwanelele wa nyo. Moohiyaniha, mmutthettheege Mulugu. ⁵Munone wi anamararuwa, naari owiirana dhootakala, naari a osilila, kinaakele mareliho a Omwene wa Kirixtu ni wa Mulugu. (Osilila weebedha dhooreela, eli wona waweedbedha amilugu eebeweene.)

⁶Kamurumeedhe onyengethiwa ni madhu eebeweene chinakamihedha.

Mwaha wa madhu owinda athu enootherga, Mulugu onowaatolosa ale chinamwiiwelela. ⁷Kamweeddege vamohi ni athu ayene. ⁸Wale nyo mwaali muyiihini, mbwenye vano muhivolowa mowaara mwaha wi muli muumohini ni Nabwiya. Mowindo mweeddege wona ahima a mowaara, ⁹mwaha wi waara onosasanya dhapama, dhowogoowa, dha ebaribari. ¹⁰Musayelege osuuza dhinamuhagalaliha Nabwiya. ¹¹Kamwiiregena dhego dhoohekanna mabasa dhineerana ale eli muyiihini. Moohiyaniha, mvaanyege dhego ndo sootakala. ¹²Sookaliha manyazo owoga dhineerisu mowiipiteya. ¹³Nadhana voweela, athu enowaanda wona mukalelo weewa, mwaha wi enooneyihiwa mowaara, enokala yoowaara. ¹⁴Mwaha-ya buuyene enawogeliisu, yiiraga:

“Nyo munagona, keemelani!
Kavenyani muukwani,
vano Kirixtu oneere oomoneyeleni”.

¹⁵Mowindo, pole-pole meeddelo eenyu. Kamweeddege wona ataduwa, mweeddege ni tthottho. ¹⁶Mpure mudhidhi waatene, mwaha wi malabo ala athu enowiirana dhootakala. ¹⁷Mwaha wa nda, kamukalege oolodhowa, musayelege osuuza dhinafuna Nabwiya. ¹⁸Kamulezelege, olezela ononoonga egumi ya muthu, moohiyaniha, mudhaaliwe ni Muneba Woweela. ¹⁹Mwiibege masaalimu, jibo dha muneba, mmohi ni mukwaaye, ni murima waatene mwiibege, moomutamaala Nabwiya. ²⁰Mmutthettheegeve mwa dhaatedhene Mulugu Babiihu, mwaha wa dhedho dhiirile Nabwiya eehu Yesu Kirixtu.

Ahiyana ni amamuna vamuralani

²¹ Mwiiveleelege wa mmohi ni mukwaaye, mooneyihaga wi muno-muriha Kirixtu. ²² Ahiyana, mwiiveleelege wa amamuninyu wona mwiiveleeliinyu wa Nabwiya, ²³ mwaha mamuna dili musogoleli a mwihiyanaaye wona Kirixtu oli musogoleli a gerezha yaaye. Oliye dili mvulumusi a gerezha. ²⁴ Wona gerezha eneeveleela wa Kirixtu, ahiyana yiiveleelege wa amamuniwa mwa dhaatedhene.

²⁵ Amamuna, mwaadhivelege ahiyaniinyu wona Kirixtu adhivele gerezha, akwela. ²⁶ Ahikwela wi eelihe ela, ahuwe ni Madhu a Mulugu ni mahinje. ²⁷ Ahiirana ela wi gerezha ekale yoowoma vathukuliye, ekala yaaye-yaaye; yoohukalana maganga, mafunya, naari yego yoofwanafwanana, mbwenye yoweela, yowogoowa. ²⁸ Mwa mukalelo mmohive amamuna yaadhivelege ahiyaniwa wona munadhiveleliwa mwiili dheewa. Oyene onamudhivela mwihiyanaaye, oneedhivela mwiinyeene. ²⁹ Kalivo oneedda mwiili waaye, mbwenye onoojiha, onokameela wona Kirixtu onakameela gerezha. ³⁰ Hiyo nili epaddi ya mwiili waaye, eli gerezha.

³¹ Wona munawogela Maleba Ootaleleya, yiiraga: *“Mwahaya buuyene mulobwana enamwihiyeliye babe ni amaaye, ataganyihedhana ni mwihiyanaaye, abiili ala enakala mwiili mmohive.”*^m ³² Vihikala ebaribari ya thima enavuhuleliwa va madhu ala: enawoga dha Kirixtu ni gerezha yaaye. ³³ Mbwenye enowoga teto dha nyo: mamuna oli aatene amudhivelege mwihiyanaaye wona muneedhiveleliye, mwihiyana oli aatene amurihege mamune.

Makalelo a abaabi ni aahima

6 ¹ Ahima, vovi muli muumohini ni Nabwiya mwawiiwelelege ababii-nyu, ameenyu, eyo sili yapama. ² *“Waariihege ababo ni amaayo ³ wi dhaatedhene dhuweeddelege pama wi ologele mudhidhi mujinji mwiilaboni ya vati”.*ⁿ (Ndda nlamulo nowambeela nnadhana nrromeliho.)

⁴ Aabaabi, kamwaatakaleliwihege aniinyu. Moohiyaniha, mwaalelege, mwaalagege, mwasuuzihege wona Nabwiya munafuneliye.

Makalelo a adhaari ni anya eewa

⁵ Adhaari, mwawiiwelelege anya eenyu a mwiilaboni mu. Mwaariihege, mwawiiwelelege ni murima waatene wona munamwiireliinyu Kirixtu. ⁶ Muhawiiwelelege yakala vevo baahi wi yuutamaalegeni, mbwenye mwawiiwelelege wona munamwiireleliinyu Kirixtu. Mwiiregena dhinafuna Mulugu ni murima waatene. ⁷ Mulabege ni ohagalala wona

^m 5.31 Wambeela 2.24 ⁿ 6.3 Deteronomiyo 5.16

munamulabela Nabwiya eehu, kamulabege wona munamulabela muthu. ⁸Muubuwelege wi Mulugu onoodha alivele mabasa apama kadda muthu yeeriye, naari akale mudhaari, naari akale muneeti.

⁹Teto anya a adhaari, mwawiirelege adhaari eenyu mwa mukalelo mmohive, muhaathuusege ni goyi. Muhunona wi nyo ni aliwa muli a Mwiinya mmohive, oli odhulu. Oliye onowaakameela aatene mwa mukalelo mmohive.

Yeela dha koddo dhoowanana mineba dhootakala

¹⁰Voomariha ginowuwaaddelani nda: Mukale ooliba mwa muneba, mwa kopolo dhuulubale dha Nabwiya. ¹¹Muware yeela dha koddo Mulugu dhinoovahiye wi mulibe, mvaanyege dhoonyengetha dha Sathana. ¹²Vowi koddo yeehu kannawana ni athu, mbwenye nnawanana mineba dha okumbasa, nnawanana mineba dha manyaga, nnawanana mineba dha okwiri ni mineba dhaatedhene dhabure dhimohi dha vati ni odhulu. Sinawanihuna sinalamula elabo ela ya yiihi. ¹³Mwaha wa ela muware yeela dha koddo ya Mulugu. Mwawara yeela nda, nadha nifiya nlabo na owana ni kopolo dhootakala, munoodha mugonjihe koddo ya mwiiddani. Mugagonjihile dhaatedhene, munokala ooliba, oohuthikeya, kamunaathawe.

¹⁴Mowindo mwiisasanyedhe muwane! Mmagele sintu na ebaribari mmwiinuni. Muware omurimani yowiithithihedhana yowaakwanela.^o ¹⁵Muware wona sathu, ofuna olaleya Muselu Wapama wa murenddele.^p ¹⁶Mweeddegenaave yowiithithihedhana ya nrromelo, eyene enathimiha mathere enahidda munddo waatene wa Nambure. ¹⁷Mmuware kapaseti oli ovulumusiwa. Mwiiddele supaadda na Muneba Woweela, eli madhu a Mulugu. ¹⁸Mwiiregena dhaatedhene dhedho mulobaga okamihedhiwa ni Mulugu, mulobelege mwa Muneba. Muwaraale. Kamugome. Mulobelegeve mulogo waatene wa Mulugu.

¹⁹Mugilobelege teto wi Mulugu agivahe madhu giwoege dha ebaribari dha Muselu Wapama mooliba. ²⁰Gili oorumiwa a Kirixtu wi gawaaddelege athu Muselu Wapama. Mwahaya buuyene gikaleliimi mukaambura mu. Mulobelege wi Mulugu agivahe oliba olaleyela wona oliye munafuneliye.

Malojelo oogomihedha

²¹Tikiku onowuwaaddelani muselu waatene onawoga dha miyo. Oliye di ddibilaga oodhivela, namalaba ooromeleya mwa mabasa a Nabwiya. Gihimuruma wi owaaddelani dhaatedhene dha okala waaga. ²²Mwahaya buuyene gimurumeliimi wa nyo: munone dha hiyo, mulibihiwe.

^o 6.14 Moone Ezaya 59.17 P 6.15 Moone Ezaya 52.7

²³Mulugu Babihu ni Nabwiya Yesu Kirixtu oovaheni, addibila aatene, murenddele, odhivela ni nrromelo! ²⁴Mulugu oonihe mahala aaye wa aatene enamudhivela mwa ebaribari Nabwiya eehu Yesu Kirixtu.